



Nuna job-imik aqqissuussi- nermik pilersitsinissamut nassuiaat

**Inuussutissarsiornermut Suliffeqarnermullu
Naalakkersuisoqarfik**

Juuli 2012

**Nuna job-imik aaqqissuus-
sinermik pilersitsinissamut
nassuiaat**

NAALAKKERSUISUT
GOVERNMENT OF GREENLAND





Imarisai

Aallaqqaasiut	2
Nunavut-ip Nunavik-illu pilersaarummi soqutigisaat	4
Nunavut	4
Nunavik	6
Kalaallit inuusuttatta akornanni aaqqissuussinerup atornissaanut soqutiginnineq	7
Nordisk Ministerrådip pilersaarutip tapersersornissaanut soqutiginninnera	9
Pilersaarusiaqqaq	10
Siunertaq	10
Periarfissinniakkat pilersaarusiaqqaallu misissornera	10
Piffissaa sumiinnissaalu	11
Peqataasussanut program-i	11
Aaqqissuussaaneq	11
Naliliineq	12
Pilersaarusiaqqaamut aningaasartuutissatut missingersuutit	12
Pilersaarusiaqqaap aningaasalersorneqarnissaa	14
Innersuussinerit	15



Aallaqqaasiut

Juliane Henningsen Jane Petersenilu UK 2011 siunnersuuteqarput Nuna job-imik aaqqissuusi-neqaqqullugu – innuttaasut inuusuttaasa akornanni paarlaasseqatigiittarnissamut programmiliortoqas-sasoq Nunatsinni kiisalu canadami Inuiaqatigiit Inuit Nunavut-miut Nunavik-miullu akornanni. Siun-nersuullu ima imaqarpoq:

”Matumuuna inatsisartut aalajangiivissaattut siunnersuut saqqummiupparput, Naalakkersuisut Nunavut-mi Nunavik-milu oqartussaasut akisussaassuseqartut suleqatigalugit suleqatigiinnissamut programmiliussasut, siunertaassasorlu inuusut-tut 16-it 30-llu akornanni neqeroortoqarsinnaassasoq paarlaasseqatigiilluni naju-gaqarnissamut – taamatullu nunani taakkunani pingasuni tamani sulisinnaassasut.

Suleqatigiinnissamut programmi aqutigalugu Kalaallit Nunaanni, Nunavut-mi Nunavik-milu inuusuttut 16-it 30-llu akornanni ukioqartut periarfissinniarlugit avannaarsuani inuuneq misileqqullugu neqeroorfigalugit suliffissaannik, najuga-qarfissaannik kulturikkullu inuunermi ingerlatseqataanermikkut, taamaaliornikkut taakku nunani allaniittut inooriaasiisigut, oqaasiisigut kulturiatigullu paasisi-masaqarnerulernermikkut.

Taamatut aaqqissuussineq/suleqatigiinnissamut programmi taamaaqataa nunani avannarlerni atorreqareerpoq taaguuteqarluni Nordjob nunanillu avannarlernit ataatsimut aningaasalersorneqarluni. Nordjob-ip sulissutigaa inuusuttut 18-it 28-llu akornanni ukioqartut nunanik avannarlernik ilisimasaqarnerulernissaat nunani avannarlerni allani namminersorlutilluunniit aaqqissuussaasuni aasaanerani sulif-fissanik neqeroorfiginerisigut.

Inuusuttut paarlaasseqatigiinnikkut najugaqartinneqartarneranni pingaartuuvoq ilisimalikkat nutaat ilisimasaqarfigilikkallu ineriartortinnissaat aamma inuusut-tunut peqataasunut tamanut ineriartortitseqataassammata. Inuusuttut nunanit as-igiinnngitsuneersut imminnut ilinniarteqatigiittarput, isumassarsianik agguaaassivi-geqatigiillutik isummanillu inuunermik ilaanni iluaqutigisinnaasaminnik tunioraa-teqatigiillutik. Taamatuttaaq oqaatsittigut ilisimasaqarnerulertarput kulturillu al-lat ilisimasaqarfiginerulerlugit, paarlaasseqatigiinnikkullu najugaqarnermi ator-sinnaasamik ilinniagaqarnermik kinguneqartitsisinnaalluni.

Naak Kalaallit Nunaanni ilinniagaqarnissaq anguniarneqaraluartoq paasinarpoq ilinniagaqarnissamut itigartitaasartut amerliartortut. August 2010-mi soorlu inis-sanut Piareersarfikkoortussanut 715-iusunut 1300 miss. qinnuteqarsimapput sulilu amerlaqisut ilinniarnertuunngorniarfikkoormissamik piumasaqaatitigut itigartin-neqartarput, aamma inuussutissarsiutitigut tunngaviusumik ilinniagaqarnermi (ar-laanni 500 arlaanni 250). Saniatigut aamma ilinniagaqaraluartut 25% miss. ilinni-arnerminnik unitsitsiinnartarput. Taamak ineriartorneq ernumanarpoq iliuseqar-figisariaqarlunilu.

Taamaattumik Kalaallit Nunaanni inuusuttortavut amerlanerusunik periarfissitta-riaqarpagut, aamma taamaaliornikkut oqaatsitigut atuisinnaanerat pitsaaneruler-



sissinnaagatsigu inuusuttortagullu inerisimanerulersillugit ilinniagaqarnermik ingerlatsilernissaannut taamatullu Kalaallit Nunaanni, Nunavut-mi Nunavik-milu inooriaasiannik kulturiannillu paasisimasaqarnerulersillugit.”

Siunnersuutip Inatsisartuni siullermeerneqarnerani aalajangiivigineqarpoq Naalakkersuisut nalunaarusi-
ussasut, paasissutissiisumik sutigut periarfissaqarnersoq, aaqqissuussinermik taamaattumik pilersitsinik-
kut. Nassuiaat taanna suliarineqarpoq UK 2011-imilu saqqumiunneqarluni. Taamaattorli nassuiaammi
innersuutigineqarpoq aalajangivissinnaanissaq pitinnagu misissuinerit amerlanerusut ingerlateqqaartari-
artut.

*”Naalakkersuisut pisussaatinneqarput kingusinnerpaamik UK 2012 nassuiaammut tapiliussat oqalli-
sissanngorlugit saqqummiutissagaat, paasissutissiisutigissallugu Nuna job-imik aaqqissuussinissamut
periarfissaqarnersoq Nunavut aamma Nunavik peqataatillugit taamatullu qanoq aaqqissuussivigi-
neqarsinnaanersaq aningaasalersorneqassasorlu.”*

Inuussutissarsiornermut Ataatsimiititap sisamat tikkuarpai, taakku erseqqinnerusumik misis-
sorneqaqqullugit:

- Nunavut-ip Nunavik-illu pilersaarummi soqutigisaat
- Nordisk Ministerrådip pilersaarutip tapersorsornissaanut soqutiginninnera
- Kalaallit inuusuttut aaqqissuussinerup atornissaanut soqutiginninnerat
- Pilersaarutip aningaasalersorneqarnissaanut periarfissat

Taamaattumik nassuiaammi saqqummiunneqartumi paasissutissiisutiginarneqarput, qanoq Nunavut
aamma Nunavik nunatsinnilu inuusuttut siunnersuummut isummersimanersut.

Tulliullugu pilersaarussiaqaaq ilisaritinneqassaaq, tassunga ilanngullugu aningaasaalersorneqarnissaa
kiisalu Nordisk Ministerråd qanoq aningaasalersueqataanissamut soqutiginnitsiginersaq.

Nassuiaat naggaserneqarpoq ingerlariaqqinnissamut kaammattuummik.



Nunavut-ip Nunavik-illu pilersaarummi soqutigisaat

Nunavut

Nassuiaammut siulianeersumut atatillugu Nunavut atassuteqarfigineqareersimavoq inuusuttut namminersortoqarfinni marluusuni paarlaasseqatigiilluni programmiliornissaannut periarfissat qulaajarniarlugit. Nassuiaammut uunga atatillugu atassuteqarfigisat annertusineqarsimapput pimoorussinerulerlutilu, taamaattorli Nunavut-imi politikkimut attuumassuteqartut tikinneqarsimanatik.

Taamaalilluni Inuussutisarsiornermut Suliffeqarnermullu Naalakkersuisoqarfimmi sinniisq Iqalunniisimavoq Nuna job-imik aaqqissuussinissamut periarfissat oqaloqatigiissutiginiarlugit Nunavut-imi peqataasinnaasunik assigiinngitsunik pissarsiniaatigaluni. Inuussutisarsiornermut Suliffeqarnermullu Naalakkersuisoqarfimmi ataatsimiinnerit sioqqullugit oqaloqatigiissutissiaq Government of Nunavut-imut oqaloqatigiissutissaq nassiunneqarsimavoq qanoq siunertaarneq takussutissikkumallugu, tak. bil. 1.

Inuussutisarsiornermut Sulisoqarnermullu Naalakkersuisoqarfiup sinniisua Nunavut-imi Namminersorlutik Oqartussat pisortaarfianik ataatsimeeqateqarpoq, taannami Nunavut-imi atassuteqarfitta pingaarnersaattut Naalakkersuisoqarfimmiit innersuunneqarsimammat. Taassuma saniatigut ataatsimeeqatigineqarput Nunavut-imi Ilinniartitaanermut Naalakkersuisoqarfik, Intergovernmental Affairsip Naalakkersuisoqarfia taamatullu Arctic College. Ataatsimiinnerit tamarmik atorfillitanik ataatsimeeqateqarnerupput.

Tamarmik siunissami Nuna job-imik aaqqissuussisoqarsinnaanera isumalluarfigaat isumaqarlutillu tassuuna aamma Kalaallit Nunaata Nunavut-illu akornanni paarlaasseqattigiittarnissamut alloriarnerusoq annertoq. Aammattaq malunnarpoq pilersaarut politikikkut tapersorsorluassangatinneqartoq, tassami pilersaarut Nunavut-imi naalakkersoqatigiit pilersaarutaannut naleqquteqimmat. Taamaakkaluortoq pilersaarutip Naalakkersuisunut saqqummiunnissaa iluatsinneqanngilaq, tamannalu pissuteqarpoq Nunavut-imi allaffissornikkut ingerlatsisoqarfiata naalakkersuisoqarfik sorleq aqqusaarneqassanersoq paa-siuminaatsimmassuk. Aatsaat tamanna qulaarneqareerpat pilersaarut politikerinut saqqummiunneqarsinnaanngussaaq, ajoraluartumilli uuma allannerani sulii piviunngorsinnaasimannilaq.

Ataatsimiittarnerni makku qitiutinneqarput: pilersaarutip siunertaa; pilersaarutip aaqqissuunneqarnissaa, najugaqariaatsit assigiinngitsut ilusilerneqarnissaat; eqqarsaatigineqartut kikkunersut peqataasus-sallu toqqarneqartarnissaat; najugaqarnerup siviussusissaa ukiullu qanoq ilineraniussanersoq; Nunavut-imi inissiivigineqarsinnaasut kiisalu najugaqarnermi suliffiusinnaasut.

Isumaqatigiissutigineqarpoq pilersaarummi siunertat pingaarnertigut kulturimut attuumassuteqartut, tassa periarfissiissalluni avannaarsuani allami inooriaatsip misigisaqarfiginissaanut, kulturi oqaatsillu Nunavut-imiinermi ulluinnarni ilaassasut, tassani aamma suliffeqarfiit eqqarsaatigineqarput. Taamaalilluni suliffimmi misilittagaqalernissaaq siunnerfigineqanngilaq, ataasiakkaalli periarfissinniarlugit inu-nermi misilittagaqarnissamik ataasiakkaallu ilisimasaqarfii annertusassallugit.



Pilersaarutip nammineq aaqqissuunneqarnissaani Nunavut eqqarsaatigalugu peqataatinneqartussat assigiinngitsut amerlaqaat, tamarmillu takorloorpaat pingaartumik Inuit Kattuffeqarfii peqataatinneqarumaartut. Tamatuma kingunerissavaa pilersaarutip piareersarneranut piffissaq sivisunerusoq atortari-aqassamat, tassami peqataatinneqartussat amerlaqisut akuliunniartariaqarmata. Nuna job-imik aaqqissuussineq taamaalilluni piaarnerpaamik 2014-imi aallartisarneqarsinnaavoq, pilersaarusiorterli 2013 aallartinnerani aallartereertariaqarluni.

Ataatsimiinnerni siunnerfigineqartut eqqartorneqarneranni pingaartinneqarpoq inuusuttut inersimasutut pisussaaffeqalereersimassasut, taamaattumik ukiussatut siunniussa 18-imiit 30-nut naleqqussorineqarpoq. Paarlaasseqatigiinnermi najugaqartitaaneq naammassineqarsinnaaqqullugu pingaartillugu isiginiarneqarpoq inuusuttut anersaakkut nukittuujusariaqartut, inooqatigiinnermi tunngavissarissaarlutik aammalu tuluttut piginnaaneqalaarnissaq pisariaqassalluni. Kiisalu pisariaqartussaavoq pineqaatisinneqarsimannginnissaq. Pilersaarut iluatsissappat pingaaruteqarluinnartussaavoq peqataasussanik eqqortunik toqqaanissaq, taamaattumik toqqaasarnerup ingerlanneqarnissaa pingaaruteqarluinnarpoq.

Najugaqarnerup siviussusia aamma eqqartorneqangaatsiarpoq. Nunavut-imut saqqummiussami Inuusutissarsiortermit Sulisoqarnermullu Naalakkersuisoqarfiup siunnersuutigisimavaa sap. ak. 6-8. Arlallit isumaqarput ilimanarsinnaasoq inuusuttut qasunarisinnaagaat angerlarsinnaallutilluunniit, taamaalippallu piffissaq naanagu uniinnarsinnaallutik. Allalli isumaqarput najugaqarneq ima siviutisariaqartoq peqataasut inooriaaseq tikitaminni atuuttoq paasisaqarfigisinnaassallugu.

Sivisussusissaanulli aalajangiisuulluinnartussaavoq najugaqarneq qanoq ilusilerneqarsimanersoq. Ilaatigut oqallisigineqarpoq najugaqarnermut akulerunneqarsinnaasoq aallaqqaasiullugu tuluttut kursusernermik imaluunniit højskolemiinnermik, Piqqusilerivvik Kangerlugaapiq-imiitog imaluunniit immaqa tamaasa. Illoqarfiit arlaqarnerusut peqataatinneqarsinnaanerannut periarfissat aamma eqqartorneqarput. Ilaatigut oqallisigineqarluni illoqarfiit assigiinngitsut assigiinngitsunik suliffissaqartartut, taamaalilluni illoqarfiit ilaanni meeqqerineramik suliaqartoqarsinnaavoq, illoqarfimmi allami takornarilerinermik, illoqarfiillu pingajuanni sammeneqarsinnaallutik isiginnaartitsineq nipilersornerlu.

Aamma pingaartinneqarpoq peqataasut akissarsialimmik suliffeqartinneqassanngitsut, namminerli piumassutsiminnik sulissallutik, Nunavut-miimmi kissaatigineqanngilaq Nuna job-imik aaqqissuussinerup namminneq aaqqissuussinitik unammillissagai, soorlu inuusuttut aasaanerani suliffinnik misilisarnerat. Aamma kissaatiginartinnegeqaat Nuna job-imi aaqqissuussinermi peqataasut tamaani innuttaasunit tigungminneqartussaagaluanik tigusinissaat.

Najugaqarnerup siviussusissaanut uiggiullugu oqallisigineqarpoq ukiup qanoq ilinerani pisassanersoq paarlaasseqatigiittarneq iluatsisimaarfiussappat. Kalaallit nunatsinniit eqqarsaataasimavoq paarlaasseqatigiittarneq aasaanerani pisassasoq. Ajornartorsiutitariinnarpaali Nunavut-imi illoqarfiit arlallit aasaanerani inuerutaasavittarmata, amerlaqisummi feriarlutik aallarsimasarmata. Aappaatigulli Nunavut-imi aasaanerani inissaqartitsiniarneq ajornannginnerugaluqaq.

Inissiat nalinginnaasumik amigaataaqaat, pingaartumik Nunavut-ip illoqarfiisa annersaanni, Iqaluit-ni, taamaattumik ilimanartussaavaa peqataasut angerlarsimaffioreersuni najugaqartarnissaat, naak paasisutissiinerpaasussaagaluortoq Nunavut-imi ulluinnarni inuuneq qanoq innersoq. Taamaattumik ilimanarnerpaavoq peqataasut tamarmik amerlasuulluunniit kollegieni ataatsimulluunniit ineqarfiusuni najugaqartarnissaat. Aasaanerani kollegieni inissat inoqarneq ajorput, taamatullumi aamma suleqataasut ineqarfii arlaqaqisut aasaanerani inoqarneq ajortut.



Nunavik

Nuna job-imi aaqqissuussineq pillugu nalunaarusiap siuliani kattuffik Makivik atassuteqarfigineqarpoq, taannami Nunavik sinnerlugu oqaaseqartartuummat. Makivik-li saaffiginnissummut iliuuseqanngilaq. Taamaattumik Inuussutissarsiutinut Suliffeqarnermullu Naalackersuisoqarfik Makivik-mut saaffigineqqippoq nalunaarusiamut uunga atatillugu paasissutisseqqulluta Nuna job-itut aaqqissuussisoqassagaluarpat soqutiginnissinnaanersut. Makivik-li tassa sulii Inuussutissarsiutinut Suliffeqarnermullu Naalackersuisoqarfimmud akissuteqarsimanngilaq.



Kalaallit inuusuttatta akornanni aaqqissu- ussinerup atornissaanut soqutiginnineq

Inuusutissarsiutinut Suliffeqarnermullu Naalakkersuisoqarfiup misilissimagaluarpaa kalaallit inuusut-
taasa pilersaarummut qanoq soqutiginnitsiginerat qulaajarniarlugu. Naalakkersuisoqarfiup taamaattumik
inuusuttut kattuffiat Sorlak atassuteqarfigisimavaa, taassumalu Nuna job-imik aaqqissuussinissaq ilu-
aralugulu soqutigilluinnarpaa, kattuffiummi sivitsortumik Kalaallit Nunaata Nanavik-illu paarlaas-
seqatigiittarnissaat soqutigisarissimammagu.

Sorlak taassuma saniatigut inuusuttunik 18-iniit 28-nik ukiulinnik katersuutsitsisimavoq siunnerfigi-
neqartut oqaloqatigiissinniarlugit. Naalakkersuisoqarfiup sinnisuata pilersaarut gruppimut saqqummi-
uppaa, tamatumalu kingorna uummaarissumik oqallittoqarsimavoq. Siunnerfigineqartup gruppiata ta-
marmiusup Nuna job-imik aaqqissuussisoqarsinnaanera isumalluarfigaat, gruppimilu ilaatigut
oqaloqatigiissutigineqarput pilersaarutip siunertaa, siunnerfigineqartut, inissaqartitseriaatsit, najugaqar-
nissap siviussusia, akissarsiaqassanersut akissarsiaqassannginnersullunniit, suliassap suussusia, suline-
rup sumiinnera, sulineq akissarsiaqarfiussannginnersoq akissarsiaqarfigineqassanersorluunniit, suliap
qanoq ittuunissaa, suliffiup siviussusia, sulilluni najugaqaatigaluni oqaatsinik ilinniartoqarsinnaanersoq
pilersaarullu najugaqarfimmut aarlaqarnerusunut siaruarneqarsinnaanersoq.

Oqaloqatigiissutigineqarpoq siunnerfigisat 18-niit 30-nut ukiullit naleqqunnersoq, imaluunniit ukiuisa
nikinganerat annikillilertariaqarnersoq. Inernilunneqarpoq 18-iniit 30-nut naleqquttusoq. Isu-
maqatigiissutigineqarporli tuluttoorsinnaanermut piunasaqaatit sakkortuallaartariaqanngitsut –
pingaartumik peqataasoq kalaallisut pikkorissuussasoq, tassami inuktitut, Nunavut-mi atorineqartut,
kalaallillu oqaasii imminnut qaneqimmata. Arlaqartut isiginiarpaat aamma Nuna job-imik aaqqissuussi-
neq kalaallit inuusuttaannut periarfissiilluartoq, tuluttut pikkorippallaanngikkaluartut paarlaasseqatigi-
inni peqataasinnaanngorlugit. Paarlaasseqatigiinnermut periarfissat allat tamarmik peqataaniarlutik
qinnuteqartunut sakkortuumik tuluttoorsinnaanissamik piunasaqaateqarmata.

Isumaqatigiissutigineqarpoq, pitsaanerpaassasoq ilaqutariinnut inissiisinnaagaanni, taamaaliornikkum-
mi peqataasut inuiaqatigiinnut akuliutivinnissaminnut periarfiginnerussammata paasisaqarfiginerussal-
lugulu Nunavut-ermiut qanoq inooriaaseqarnersut. Inissiivissaq najugaqaqatigiinniitineqassappat kol-
legieniitineqassappalluunniit allanik kalaaleqarfiunngitsuni, peqataasut inuiaqatigiinnut akuliunnissa-
minnut tassaniinnerminni periarfissaqangaanngillat. Najugaqaqatigiiffiit kollegiellu tamaakkaluartoq
akuerineqarsinnaapput Nunavut-imi najugaqartunik atuaqateqartitaappata. Saniatigut oqaloqatigiis-
sutigineqarpoq imaassinnaasoq peqataasut angajulliit kollegiemiikkusunnerussasut ilaqutariinniititaanis-
saminniit, taamaattumik siunnersuutigineqarpoq soorlu 25-niit ukiullit namminneq sumiikkusunnertik
aalajangertassagaat.

Oqaloqatigiissutigineqarpoq sap. 6-8 siviullaassanersoq, peqataasut ilaat taamak siviutigisumik naju-
gaqarfimmiisinnanaaviannngimmata, soorlu ilinniartut, inuusuttut suliffeqartut imaluunniit inuusuttut
meeraqartut. Taamaattumik siunnersuutigineqarpoq, angalaneq nikerartinneqarsinnaasoq imaalillugu,
peqataasut ataatsikkut aallarunik ilaalli sap.ak. sisamaannarni tassaniillutik, allat sap. ak. 6-8 tassaniittut.

Saqqummiunneqarpoq siunnerfiit annertusineqarsinnaasut sulineq akissarsiaqarfiussappat ineqarner-
mut nerisaqarnermullu peqataasut isumalluusiinnarnagit. Saniatigut saqqummiunneqarpoq, sulineq
akissarsiaqarfiussappat akissarsiaqarfiussanngippalluunniit, pitsaanerussasoq aningaasat amerlanngit-
sukkaarlugit tunniunneqartarpata najugaqarneranni soorlu ullut 14-ikkaarlugit. Taamaaliornikkut



peqataasut aningaasaatiminnik aqutisinnaajunnaarnissaat pinngitsoorneqarsinnaammat najugaqarne-
rup naalernerani aningaasassaruttoornissamit.

Siunnersuutigineqarpoq sap. ak.-nut akunnerit suliffissat 30-t naleqquttuussasut. Taamaaliornikkummi
sammissassanut allanut periarfissaqalissaaq, sivisoorujussuarmik sulinngiffeqartittarnagit susas-
saaleqeqinammata.

Isumassarsiaq peqataasussat Nuummut Oqaatsinik Ilinniarfimmi tuluttut sungiusartinneqartarnissaat
annertuumik tapersorneqarpoq. Nunavut-imi najugaqartussanut oqaatsitigut tunuliaqutassatigut
nukittorsaataasussaavoq peqataasullu ataatsimoorinnaanerannut aallartinnagit nukittorsaataasussaallu-
ni.

Nunavut-imi allaffimmiut oqaloqatigineranni saqqummiunneqarsimavoq paarlaasseqatigiinneq Nuna-
vut-imi illoqarfinnut assigiinngitsunut siaruarneqarsinnaasoq, illoqarfiimmi tamarmik immikkut sulif-
finnik ingerlatsiviummata. Iqaluit-ni soorlu Day Camps-imi sulisoqarsinnaavoq, illoqarfinni allani ta-
kornariaqarneq ingerlanneqartoq. Isuma taanna siunnerfigineqartut iluarisimaarpaat, tassami piffiit ata-
asiakkaat inuusuttunit ornissallugit kajungernerusinnaammata.

Ataatsimut naliliisoqarsinnaavoq siunnerfigineqartuniit pilersaarussiaq tapersorsorluarneqartoq.



Nordisk Ministerrådip pilersaarutip taper- sersornissaanut soqutiginninnera

Nordisk Ministerrådip Nuna job tapersensoriarsinnaanngilaa aningaasatigut allaffissornerulluunniit aaqqissuussivigineratigut.



Pilersaarussiaqqaq

Kalaallit inuusuttaasa kattuffianit Sorlak-mit Nunavut-imilu atorfilittanit kaammattuilluni nalunaaru-teqarnek tunulequtaralugu tunngavissaqarluarpoq Nunavut eqqarsaatigalugu Nuna job-imik aqqissuus-sineq piviusunnigortinniassallugu.

Nordjobb isumasioreerlugu, taakkumi paarlaasseqatigiittarnermi aallarteriarneq programmilornerlu misilittagaqarfigereermatigik, paasinarsivoq pilersaarussiaqqaq suliarisariaqartoq inuusuttut kattuffiillu soqutiginninnerat takuniarlugu sapinngisamik piviusorpalaartumik. Inuussutissarsiornermut Suliffeqar-nermullu Naalakkersuisoqarfik taamaattumik pilersaarussiaqqaamik ilusiliivoq, siunnerfigineqartut Nu-navut-imilu atorfilittat akissutaat periarfissaqartikkumallugit.

Pilersaarussiaqqaap takutissappagu soqutigineqartoq paarlaasseqatigiittarnermut programmissaq ilusiler-sorneqarsinnaammat.

Siunertaq

Pilersaarussiaqqaap siunnertaata siunnersuummik siunnersuuteqartut siunnersuutaattut siunertaqarpoq: Inuusuttut nunatsinniittut Nunavut-imiittullu periarfississallugit avannaarsuani nunami allami misi-gisaqartissallugit suliffissaannik, najugaqarfissaannik kulturikkullu ingerlatsivinni peqataanissaannut periarfississallugit, taamaaliornikkut inuusuttut allat inooriaasiannik, oqaasiinik kulturiannillu ilisi-masaqarnerulersissallugit.

Siunnersuuteqartut siunnersuutaanniit allaassutigaa nammineq piumassuseq malillugu sulinerusus-saammat akissarsiorfiunani. Taama ilusiliisimanermit tunngaviunerpaavoq Nunavut-ip kissaatiginngimmagu Nunavut-imi pilersaarutinut assingusunut unammillertunngussasoq, soorlu inu-usuttortamik aasaanersni suliffinnik misiliisinneqartarnerannut. Tulliullugu nammineq piumassuseq malillugu sulineq ataasiakkaat sulisinnaanermit akuersissutinik pissarsiniaqqaartariaqassanngimmata, taamalu pilersaarutip aqunniarneranut oqilisaataasussaalluni.

Periarfissinniakkat pilersaarussiaqqaallu misissornera

Pilersaarussiaqqaq pissutissaqavissumik siunnersuutigineqqaartunit killiliiffigineqarneruvoq tunng-avigalugillu inuusuttut akisussaassuseqartut 18-iniit 30-nut ukiullit paarlaasseqatigiittassasut Kalaallit Nunaata Nunavut-lu akornanni. Taama killiliisoqartariaqarsimavoq Nunavut-ip piumasai inuusuttut pilersaarummi peqataasussat akisussaassuseqassasut naammassisinnaajumallugit pilersaarussiaqqaallu misilinneqarnissaa oqilileriffiginarlugu.

Peqataasussat toqqarneqassapput sinerissami Piareersarfiit siunnersortaat suleqatigalugit. Pingartin-neqarpoq peqataasut tarnikkut inuunermilu tunulequtarissaarnissaat, oqaatsitigut pisariaqartutigit pisinnaasaqarnissaat, taamaalillutik najugaqarnertik anigorluarsinnaaqullugu.



Piffissaa sumiinnissaa

Paarlaasseqatigiinnissaa eqqarsaatigalugu siunnersuutigineqarpoq juni-juli 2014 ingerlanneqarumaartooq inuusuttut Kalaallit Nunaanniit 15-it peqataasoralugit, taakkulu neqeroorfigineqassasut sap.ak. 4-8 Nunavut-imi Iqaluit-ni najugaqartussanngorlugit, kiisalu inuusuttut 15-it Nunavut-miit, taakkulu neqeroorfigineqassasut Kalaallit Nunaanni illoqarfimmi annerusuni najugaqarnissamut. Paarlaasseqatigiinnerup iluatsilluarnissaa qulakkeerniarlugu siunnersuutigineqarpoq, Kalaallit Nunaanniit peqataasussat tamarmik Nunavut-mi illoqarfimmut ataatsimut ingerlatinneqassasut, Nunavullu peqataatitai Kalaallit Nunaanni illoqarfimmut ataatsimut ingerlatinneqassasut. Nunavut-mi inissaminiivipooq illoqarfiisa annersaannut Iqaluit-nut ingerlatitsinissaaq, taakkumi periarfissaqarnerpaapput naleqquttumik suliffissaqartitsinissamut illersorneqarsinnaasumillu najugaqartisinissamut. Siunnersuutigineqarpoq Kalaallit Nunaanni illoqarfik angisuujussasoq soorlu Nuuk, Sisimiut, Ilulissat imaluunniit Qaqortoq.

Peqataasussanut program-i

Pilersaarussiaqqaami siunnersuutigineqarpoq angalaneq angalaqatigiissitsinertut aaqqissuunneqassasoq, kulturikkut ingerlanneqartussat ataatsimoorussaassallutik, peqataasulli ataasiakkaat ineqarnikkut suliffeqarnikkullu immikkoortitaarlugit aaqqissuussivigineqassallutik.

Sulineq aaqqissuunneqassaaq akissarsiaqarfiunngitsumik nammineq piumassutsimik sulinertut soorlu pisortat suliffeqarfiini suliffinnilu namminersortuni. Assersuutitut taaneqarsinnaaput: Meeqqeriviit, nuntarterinerni ajornanngitsuni eqqiaanermilu, allaffimmi ikiuunnermi, inuusutissarsiuutini ingerlareersuni peqataanermi, kulturikkut aaqqissuussinerni peqataanermi il.il.

Kissaatigineqarpoq peqataasut angerlarsimaffinni inissinneqarnissaat, Iqaluit-nili inissiat ajornartorsiutaaqimmata ilimanarsinnaavoq kollegieni ineeqqaniluunniit attartukkani najugaqartinneqarnissaat. Najugaqarfik periarfeqartillugu najugarineqartunut naleqquttuussaaq, inuusuttullu ulluinnarni pisussaaffinnut soorlu nerisassiornermut, illulerinermut il.il. peqataatinneqassaaq.

Iqaluit-niinneq tapertaqartinneqarsinnaavoq Nuummi Sisimiuniluunniit oqaatsitigut pikkorissarnermik aamma/imaluunniit højskolemiinnermik, Piqqusilerivvik-mi Kangerlugaapiq-imiittumi. Kaammattuutigi-neqarporli pilersaarummut ataqatigiissitsisuusooq periarfissaqartinneqassasoq kingusinnerusukkut allatut katiterisinnaanissamut.

Aaqqissuussaaneq

Siunnersuutigineqarpoq nuna nassitsisuusooq pilersaarutip aqunneqarneranut, angalanermut inuusuttullu najugaqarnerannut aningaasartuutit tamaasa akilissagai. Nunap tiguisussap isumagissavaa nammineq piumassutsimik suliffissaaq ineqarnissarlu kiisalu kulturikkut aaqqissuussinernut peqataatitsisarneq najukkami takornariartitsisartumit aqunneqartuni.

Saniatigut siunnersuutigineqarpoq, Kalaallit Nunaanni piffissap ilaannaa sulisartumik pilersaarummut pisortatut atorfinitsitsisoqassasoq 1. august 2013 miss.-niit 31. august 2014 missaanut. Nunavut aamma pilersaarummut pisortassamik atorfinitsitsisariaqassaaq pilersaarut tasamani naammassineqarsinnaaqqullugu, tassanilu Nunavut nammineq aningaasaliisuusariaqarpoq.

Pilersaarummut pisortaasut marluk pilersaarutip piareersaasiornissaa tamaat isumagissavaat, tassunga ilanngullugit fondinut qinnuteqaatit, paarlaasseqatigiinnermi najugaqarnerup ilusilersorneqarnissaa,



paasissutissanik pissaqartitsinissaq, inuussutissarsiutinik ingerlatsiviusut atassuteqarfigissallugit ilaati-
gullu immaq ilaqutariit najugaqarfissat il.il. Pilersaarummut pisortaasut taamatuttaaq paarlaasseqatigi-
innermi najugaqarneq tamaat naammassineqarsinnaatissavaat aamma immaq paarlaasseqatigiinnermi
peqataasut angalaqatigisassallugit. Taamattarlu pilersaarummut pisortaasut isumagissavaat pilersaar-
taasimasup naliliiffigineqarnissaa.

Naliliineq

Pilersaarussiaqqaq naliliiffigineqassaaq ukiakkut 2014 pilersaarutillu pilersaarusiornissaa allaaserineqas-
saaq saqqummiunneqarlunilu UP 2015-mi.

Pilersaarussiaqqaamut aningaasartuutissatut missingersuutit

Ataaniipput pilersaarussiaqqaap 2013-mit 2014-imut ingerlanneqarnissaanut aningaasartuutissatut mis-
singersuusiat.

2013-imut aningaasartuutissanut missingersuutit:

Oqaaseqaatit:

- Naatsorsuutitut ilaatinneqarpoq piffissami ilaannakumi pilersaarummut atorfeqartitinissaq 1.august-
31.december .
- Naatsorsuutigineqarpoq Kalaallit Nunaanniit Nunavut-mut angalaqatigiittoqassasoq Memorandum
of Understanding isumaqatiginiariartorlugu atsioqatigiiffigiartorlugulu. Angalaqatigiilli Nunavut-
imeersut aamma aggersarneqarsinnaapput, taamaassappallu aningaasartuut taanna peerneqar-
tussaavoq.

Aningaasartuutissat	Aningaasartai
Pilersaarummut pisortaq	125.000 kr.
Nunavut-mut angalaqatigiit	82.000 kr.
Paasissutissiinnermut atortussat	80.000 – 100.000 kr.
Katillugit	287.000 – 307.000 kr.

2014-imut aningaasartuutissatut pilersaarutit

Oqaaseqaatit:

- Pilersaarussiaqqaq ilaannakortumik pisortaqartitsinissaq 1.januarimiit 30- aprilimut ilaatinneqarpoq,
piffissamilli tamakkiisumik atuiffiussalluni 1. maj-imiit 31. augustimut.
- Naatsorsuutigineqarpoq Iqaluit tungaannut Nuummiit ataatsimut angalasoqassasoq. Taamaattumik
naatsorsuutigisariaqarpoq Nuummeersuunngitsut timmisartorlutik tikikkumaartut. Naatsorsuutigi-
neqarpoq agguaqatigiissillugu billetsit Nuuliarnermut 6000 kr-qarumaartoq inunnut 15-inut.
- Inuit 16-it angalanerat ineqarnerallu, naatsorsuutigineqarpummi atuartut 15 + pisortaq.
- Nerisat/kaasarfimmiussat naatsorsorneqarput peqataasut ilaqutariinni inissinneqarsinnaannginnis-
saat aallaavigalugu taamaattumillu nerisassarsiutissinneqassallutik. Iqaluit-ni nerisassat akisoqim-
mata naatsorsuutigineqarpoq peqataaasumut ataatsimut ullormut 200 kr-nik nerisas-
sarsiutissaqarnissaaq.



Aningaasartuutit	Aningaasat
Pilersaarusiasamut pisortaq	500.000 kr.
Ullormusiat pisortamut (sap.ak.8)	22.400 kr.
Angalaneq Nuuk uterl. (inuit 15)	90.000 kr.
Angalaneq Nuuk – Iqaluit uterl. (inuit 16)	136.000 kr.
Ineqarneq Iqaluit (sap.ak.8 inuit 16)	192.000 kr.
Nerisat/kaasarfimmiut (sap.ak.8 inuit 15)	180.000 kr.
Kulturikkut Nuummi aaqqissuussinerit inuusut- tunut Nunavut-meersunut	100.000 kr.
Katillugit	1.220.400 kr.

Oqaatsinut sap.ak. ataaseq sungiusarnermi immikkut aningaasartuutissat, periarfusinaavoq aamma Nunavut-mi højskolerneq

Oqaaseqaatit:

- Nerisanut/ineqarnermut naatsuinermi aallaavigineqarpoq peqataasut sømandshjemmimi najugaqar-nissaat. Kollegieni najugaqarsinnaappata qularnanngitsumik aningaasartuutit appangaatsiassapput. Immikkut aningaasartuutissanut ilaatinneqarputtaaq Iqaluit-ni nerisaqarneq ineqarnerlu annikinne-russasut najugaqarneq sap. ak. ataaseq sivikinnerussappat.

Aningaasartuutit	Aningaasat
Atuartitsineq	25.000 kr.
Ininik attartorneq	35.000 kr.
Immikkut aningaasartuutit nerisat/najugaq	80.000 kr.
Katillugit	140.000 Kr.

Pilersaarusiaqqaap naammassinissaanut aningaasartuutit tamarmiusut

Pilersaarusiaqqaq qulaani allaaserineqartutut naammassineqassappat.

Aningaasartuutit	Aningaasat
Aningaasartuutit 2013-imut	307.000
Aningaasartuutit 2014-imut	1.220.400
Oqaatsinut sungiusarnermi immikkut anin- gaasartuutit	140.000
Katillugit	1.667.400



Pilersaarussiaqqaap aningaasalersorneqarnissaa

Nordisk Ministerrådip pilersaaruteqqaamut aningaasalersueqataanissaq allaffissornikkulluunniit peqataanissaq peqataaffiginiangilaa. Taamaammatt pilersaarussiaqqaap ingerlanneqarnissaanut apeqqutaalerpoq allatigut aningaasalersorneqarnissaa, aningaasartuutitut matussusiisussarsiorluni aningaasaateqarfinnik aningaasaliisussanik ujartuisoqartariaqassaaq. Inatsisartut Nuna Job pillugu pilersaarussiaqqaq akuersissutigippassuk Naalakkersuisoqarfiup ingerlatitseqqittussap akisussaaffigisussa-assavaa aningaasaateqarfinnut aningaasaliisinnaasunik ujartuinissaq.



Innersuussinerit

Misissuereernerit Nuna job-ip nalunaarusiornerini marluusunitut aallaavigalugit maanna kaammattuutigineqarpoq Nuna job-imut pilersaarussiaqaaq nassuiaammi uani allaaserineratut isikkoqartillugu akuersissutigineqassasoq.